

ՀԱՌԻՐԱ ՄՈՒՐԱԴՅԱՆ

ՆՈՐ ՈՒՍՈՒՄՆԱՍԻՐՈՒԹՅՈՒՆ ԱՐԵՎՍՏԱՀԱՅ ԳՐՈՂ,
ՏԻՐԱՆ ՉՐԱՔՅԱՆԻ (ԻՆՏՐԱ) ԿՅԱՆՔԻ ԵՎ ԳՈՐԾԻ ՄԱՍԻՆ

Հողվածում ներկայացվում է բանասիրական գիտությունների դոկտոր Պետրոս Դեմիրճյանի նոր աշխատությունը՝ նվիրված արևմտահայ գրող Տիրան Չրաքյանի (Բնտրա) ստեղծագործությանը:

Ուսումնասիրությունը դիտարկվում է որպես առաջին ամբողջական հետազոտություն գիտական կենսագրության ժանրով՝ ներառելով ժամանակի հասարակական-գրական համապատկերը: Աշխատությունն արժնորվում է հաճախ ոչ հայտնի, հարուստ փաստական նյութերի, ինչպես նաև առաջադրվող տեսական խնդիրների քննությամբ:

Բանալի բառեր՝ արևմտահայ գրականություն, գիտական կենսագրություն,
«Ներաշխարհ», «Նոճաստան», խորհրդապաշտություն, ազգային մտածողություն:

Մեր գրականության արևմտահայ հատվածի շուրջ հետաքրքրությունը վերջին տասնամյակներում նոր վերելք է ապրում՝ գրավելով ուսումնասիրողներին հետազոտության նոր ոլորտների հայտնաբերմամբ: Կարելի է ասել, որ գրականագիտության մեջ հաստատված որոշակի ավանդույթը նախանշում է հետագա ուսումնասիրությունների անհրաժեշտությունն ու հեռանկարային արգասավորությունը: Այդ իմաստով է հատկանշվում Պետրոս Դեմիրճյանի «Տիրան Զրաքյան (Բնտրա) կյանքը և գործը» ուսումնասիրությունը, որ լույս է տեսել ծավալուն գրքով 2016 թվականին¹:

Տիրան Չրաքյան-Ինտրայի գործի ուսումնասիրման գրավչությունը մերօրյա հետազոտողի համար հասկանալի է մի շարք առումներով: Գրող-իմաստասերի՝ առեղծվածներով լեցուն կյանքն ու ստեղծագործությունը խնդրադրության լայն հնարավորություններ են ընձեռում՝ միաժամանակ ի հայտ բերելով գրողի արժեքայնության նոր որոնումների ցանկալի մատույցների ձգտումը: Առաջադրվող աշխատության դեպքում այս գործոններին միանում են անթաքույց մեծ սերը և մասնագիտական բացահայտումների համառ ջանքը, որոնք անպայմանորեն իրենց դերն են ունեցել թեմայի ընտրության հարցում: Կարծում ենք՝ այս գործոններն էական են, քանի որ Պետրոս Դեմիրճյանի գրականագիտական բազմաթիվ նախասիրություններում Ինտրա երևույթն արդեն տարիներ շարունակ հետևողական ու լուրջ քննության բնույթ է կրում: Հենց այդ իմաստով էլ ուշագրավ է համալրված գործառնությունը

¹ Պետրոս Դեմիրճյան, Տիրան Չրաքյան (Բնտրա). Կյանքն ու գործը, կամ՝ «Հեքիաթի իրականությունը», Եր. ՀԳՄ հրատ., 2016, 720 էջ:

հատկանշվող աշխատությունը, որ ներառում է դիտարկվող նյութի հետ կապված բազմապիսի հարցադրումներ՝ դրանց գտնված պատասխաններով: Դրսևորվել է ուսումնասիրողի մոտեցման էական առանձնահատկությունը՝ բացահայտել ոչ միայն գեղարվեստական երևույթն իր խորքով, բացառիկությամբ, այլ նաև գեղագետի անհատականությունն ու ստեղծագործական իմացաբանական հիմքերը:

Ծավալուն ուսումնասիրությունը բաղկացած է ներածությունից, հինգ մասերից՝ ժամանակագրությունից՝ իրենց 13 գլուխներով, ծանոթագրություններից, բառացանկից և օգտագործված գրականության ու հապավումների ցանկերից: Կառուցվածքային հնարավոր տարբերակներից ընտրելով ժամանակագրական՝ կյանքի և ստեղծագործության զուգորդվող քննության տեսակը, ուսումնասիրողը ներածության մեջ համառոտ ներկայացրել է հետազոտության նյութը, նպատակը, արդիական նշանակությունը, ինչպես նաև պատճառաբանված աղերսները համաշխարհային և հայ գրականության զուգահեռներում: Կարևորելով մտահղացման տրամաբանությամբ և նյութի յուրահատկությամբ պայմանավորված կառուցվածքի սահմանագծումը՝ պետք է նշել, որ գրքի հեղինակի մանրակրկիտ մտածված ամբողջական մոտեցումը թույլ է տվել ներթափանցել գրողի գեղարվեստական մտածողության շերտերը, բացահայտել նրա ինքնատիպ աշխարհի առանձնահատկությունները: Անշուշտ, յուրաքանչյուր հետազոտող ազատ է քննության ուղիների ընտրության մեջ, և հիմնականում համաձայնելով հեղինակի առաջարկած ներածության բնույթին, որտեղ առկա է նյութի մասնագիտական ընկալումը, կարծում ենք՝ նպատակահարմար կլիներ առավել հանգամանորեն ներկայացնել ներածության մեջ հարցի պատմությունը, ուր կդիտարկվեին նախորդ ուսումնասիրողների կարծիքներն ու տեսակետները: Բացի անհրաժեշտ գիտական տեղեկատվությունից, դրանով ստուգության կենթարկվեին հեղինակի հետագա քննության առաջադրությունները: Անարդար կլիներ չնշել՝ գլուխների շարադրանքի ընթացքում հեղինակը տարբեր առիթներով անդրադարձել է Ռեթեոս Պերպերյանի, Հակոբ Օշականի, ինչպես նաև մերօրյա հետազոտողներից Վազգեն Գաբրիելյանի, Ստեփան Թոփչյանի, Վլադիմիր Կիրակոսյանի, Գրիգոր Պրլտյանի և շատ այլ գրականագետների տեսակետներին, այսինքն իրապես կարևորում է դրանք՝ գրողի կյանքի և գործի ամբողջական ներկայացման համար: Սակայն այստեղ խոսքը վերաբերում է ժամանակների հոլովվածքում գրողի գնահատման գրականագիտական լիարժեք պատկերին, որը ցանկալի կլիներ տեղադրված տեսնել հենց ներածության էջերում: Թվարկվել են անուններ, այնինչ, այդ ուսումնասիրողների գործի քննությունը պատմագործառությային հայեցակետից ցույց կտար տարբեր մոտեցումներով գրողի նշանակության բացահայտման շերտերը ժամանակների հոլովվածքում:

Չրաքյան-Ինտրայի անձի և գործի հանդեպ հետաքրքրությունը, արժևորող կարծիքներն ի հայտ են եկել նրա գրական առաջին փորձերի հետ և շարունակվել ու խորացել գրականագիտական նշանակալի իրացումներով: Շուրջ մեկ և կես դար ձգվող այդ պատմությունը նաև յուրօրինակ անդրադարձն է այն տեղաշարժերի, որ ունեցել է

համապատկերում «ներաշխարհը» և Ինտրային ընկալելու, ճանաչելու և ի վերջո արժևորելու ուղիներում գրականագետի դրույթների հաստատման հուսալի հենարան են դառնում հենց իր՝ Ինտրայի «ներաշխարհ»-ն իր հեղինակէն դիտուած» ինքնադատական հոգվածը, ինչպես նաև ավելի ուշ հրապարակված «Կարծիքներ և կարծողներ» վերլուծականը, Մ. Կյուրճյանին ուղղված նամակները, տարբեր առիթներով գրված գրախոսականները և այլ գրություններ: Այս առումով կարծում ենք արդարացված է ուսումնասիրողի մոտեցումը, երբ իր քննության մեջ առաջնորդվելով հենց գրողի հավատամքի փաստարկումներով, որոնք լիարժեքորեն բացահայտում են և «Ներաշխարհի» ուրույն ստեղծագործական հայեցության հիմքերը, հղացման նպատակը՝ հաստատում է նրա երկի փիլիսոփայական-էթիկական-հոգեբանական գործառույթների փոխներթափանցված դաշնությունը:

Իր իսկ՝ Ինտրայի բնորոշմամբ՝ «Ներաշխարհի» «երբեակ հատկանիշների»՝ բնութենապաշտի, կենսապաշտի ու բարոյապաշտի սկզբունքների երևույթն էր այդ դաշնությունը, ինչը դառնում է որոշակի գեղագիտություն, որի մեկնության խորքային շերտերում Դեմիրճյանը գտնում է աղերսներ ոչ միայն եվրոպական, այլև Արևելքի դարավոր պոեզիայի ու արձակի նախորդ փորձի ուղենշային երևույթների հետ: Ընդ որում, այդ աղերսների ընդգծումը չի հանգում ազդեցությունների բացահայտման: Դեմիրճյանը գտնում է շատ ավելի կարևոր՝ գեղարվեստական մտածողության տիպաբանական ընդհանրություններ՝ միաժամանակ հետևողականորեն շեշտելով Զրաքյան-Ինտրայի՝ ինքնության երևույթով բնորոշվող հայեցության ուրույն բնույթը: Ի վերջո, գրականագետի մեկնություններում գրողի՝ բնություն-կյանք-գոյի իմացաբանության և գեղագիտության առանցքն է հայտ է գալիս ոչ միայն միջտեքստային հարաբերություններում, այլև տիեզերականի համաստվածային ընկալումից, որ ձգվում է որոշակի տեղանք-բնակավայրից՝ իբրև ներաշխարհային իրողություն:

Ինտրայի քնարական-գեղագիտական հայեցության դրսևորումների քննությունն ուսումնասիրության ըստ ամենայնի ուշագրավ մասերից է:

Հոգվածների, նամակների, բանավեճերի մանրամասն դիտարկումներում Դեմիրճյանն է հայտ է բերում գրողի տեսադրույթներից բխող որոշարկված սկզբունքները, որոնք հստակեցվում և ձևավորում են դրանց համակարգված բնույթը: Մակայն ուսումնասիրողի՝ ամբողջության մեջ արդարացված միտումը՝ ներկայացնելու գրողի և մտածողի տեսակետների ճշմարտացիությունը, երբեմն վերածվում է անվերապահ հիացումի կամ կրքոտ հակադարձման, մանավանդ, երբ խոսքը վերաբերում է «Ներաշխարհի» տարամետ գնահատումներին: Նույնականանում են նույնիսկ այդ կարծիքները որակող արտահայտությունները՝ «միջակություններ, կանխակալ ու չարամիտ, անհեթեթ, սուտ ու սխալ» մեկնաբանություններ և այլն: Եթե Զրաքյանի պարագայում միանգամայն հասկանալի են զգացական վրդովմունքն ու հուզական բնորոշումները «քննադատությունների» հասցեին, ապա հետազոտող հեղինակի դեպքում տեղին կլիներ պահպանել պատմական-քննական հայացքի զուսպ, անխտորը ընթացքը, ինչով բնութագրվում է ուսումնասիրությունն իր համատեքստի ամ-

բողջական բովանդակությամբ:

Չրաքյանի ստեղծագործական անհատականության արտասովոր, նաև բազմաբնույթ երևույթը լիարժեք նկարագիր է ստացել աշխատության հաջորդ գլուխներում՝ «Նոճաստանի», մանկավարժական հայացքների, հուշ-ուղեգրությունների հանգամանակի վերլուծություններում: Կուզենայինք առանձնացնել այդ արժեքավոր քննությունն այն իմաստով, որ աշխատության հեղինակի հետևողական ջանքով այստեղ ի ցույց են հանվում և հաստատվում Չրաքյանի խորապես ազգային, հասարակական պատկերացումները: Ինչպես իրավացիորեն նշում է Դեմիրճյանը, հատկապես «Աղօթք», «Տօրոսն անցք» գործերում «դրսևորվել են գրողի ազգասիրությունն ու հայրենասիրությունը»՝ դրանով իսկ հերքելով ազգային կյանքին անհաղորդ մնալու մասին կարծիքները: Ուսումնասիրության վերջին՝ հինգերորդ մասում, հենվելով ժամանակակիցների՝ Վ. Թեքեյան, Ե. Օսյան, Նշան Պեշկալյան, Թեոդիկ և շատ ուրիշների հուշերի, տեղեկությունների վրա, հեղինակը վավերագրական ճշգրտությամբ վերականգնում, ամբողջացնում է Չրաքյանի կյանքի վերջին տարիների՝ 1919-1921 թ. պատմությունը՝ ձեռքակալության, աքսորի և ի վերջո, եղբրական մահվան դրվագներով:

Աշխատության հեղինակը, ձգտելով Չրաքյանի գործի ամբողջական, գիտական համակարգված հետազոտության հասունացած պահանջի իրագործմանը, պատշաճ արդյունքի է հասել առաջադրությունների նպատակաուղղված, բազմակողմանի քննությամբ: Ծավալուն շարադրանքում առկա է հեղինակի՝ հետազոտվող նյութին բազմակողմանի տիրապետումը: Դեմիրճյանի ուսումնասիրության գիտական նորույթը ոչ միայն աննախադեպ ամբողջացված նյութի անդրադարձն է, այլև գրողի կյանքի ու գործի պատմության իմաստային դաշտի լայնացումը, որտեղ կարևորվում են ոչ միայն նորահայտ փաստերը, այլև նոր մոտեցումները գրողի կենսապատմը, ստեղծագործական առնչությունների ներդաշնակությունն ու հակասությունները մեկնաբանելիս: Ընդհանրապես ողջ շարադրանքի էական արժանիքն է ամբողջական համակարգում հատկանշվող նոր փաստերի, ճշտումների առաջին անգամ շրջանառելու երևույթը: Կատարվել են բազմաթիվ բանասիրական ճշտումներ՝ կապված գրողի կյանքի և ստեղծագործության հետ, ճշգրտվել են գործերի ստեղծման, տպագրության տարեթվեր, ճշտվել են նաև հուշագիրների կողմից ներկայացված որոշ փաստեր, տարեթվեր, այդ թվում, որ կարևոր է, նաև Տիրան Չրաքյանի մահվան օրը՝ 1921 թ. հունիսի 6-ը:

Պետրոս Դեմիրճյանի ուսումնասիրության հետազոտական արգասավորությամբ մեկ անգամ ևս հիմնավորվում է արևմտահայ գրականության բացառիկ արժեքների նորովի, խորքային ճանաչման, բացահայտման պահանջը՝ ի նպաստ ազգային գրականության ամբողջական համապատկերի:

НОВОЕ ИССЛЕДОВАНИЕ О ЖИЗНИ И ТВОРЧЕСТВЕ ЗАПАДНО-АРМЯНСКОГО ПИСАТЕЛЯ ТИРАНА ЧРАКЯНА (ИНТРА) - **ЛАУРА МУРАДЯН** - В статье представлена новая монография доктора фил. наук Петроса Демирчяна «Тирани Чракян (Интра), жизнь и творчество или реальность «сказки».

Работа рассматривается как первое целостное исследование в жанре научной биографии, включая панораму общественно-литературной жизни Западной Армении, посвященное изучению жизни и творчества писателя Тирани Чракяна (Интра). Серьезными достоинствами книги являются богатые документальные, часто малоизвестные материалы, а также предлагаемые некоторые теоретические проблемы.

Ключевые слова: западноармянская литература, научная биография, «Духовный мир», «Кипарисовая роща», символизм, национальное мышление.

NEW STUDY ON THE WORK OF WESTERN ARMENIAN WRITER TIRAN CHRAKYAN-**LAURA MURADYAN** - The article presents the new monography "Tiran Chrakyan (Intra), life and work or reality of Tale" by Petros Demirchian, Doctor of Philological Science. The work is seen as the first holistic study in the genre of scientific biography, including the panorama of social- literature life of Western Armenia, devoted to the study of life and work of West-Armenian writer Intra (Tiran Chrakyan) . The serious dignity of the book is the rich documentary, often little known materials, and also some proposed theoretical problems.

Key words: Western Armenian literature, scientific biography, «Inner world», «Cypress Park», symbolism, national thinking.